

佛說緣起聖道經

良八

五

唐三藏法師玄奘奉詔譯

如是我聞一時薄伽梵在室羅筏國住誓多林給孤獨園與大苾芻衆千二百五十人俱及諸菩薩摩訶薩等無量大衆爾時世尊告諸大衆吾未證得三菩提時獨處空閑寂然宴坐發意思惟甚奇世間沉淪苦海都不覺知出離之法深可哀愍謂雖有生有老有死此沒彼生而諸有情不能如實知生老死出離之法我復思惟由誰有故而老死如是老死復由何緣我於此事如理思時便生如是如實現觀由有生故便有老死如是老死由生爲緣我復思惟由誰有故而得有生如是生者復由何緣我於此事如理思時便生如是如實現觀由有有故便得有生如是生

者由有爲緣我復思惟由誰有故而得有有如是生者復由何緣我於此事如理思時便生如是如實現觀由有取故便得有有如是生者由取爲緣我復思惟由誰有故而得有有如是取者復由何緣我於此事如理思時便生如是如實現觀由有愛故便得有有如是取者由愛爲緣我復思惟由誰有故而得有愛如是愛者復由何緣我於此事如理思時便生如是如實現觀由有受故便得有受如是愛者由受爲緣我復思惟由誰有故而得有受如是受者復由何緣我於此事如理思時便生如是如實現觀由有觸故便得有受如是受者由觸爲緣我復思惟由誰有故而得有觸如是觸者復由何緣我於此事如理思時便生如是如實現觀由有六處便得

良八

六

有觸如是觸者六處爲緣我復思惟由誰有故而有六處如是六處復由何緣我於此事如理思時便生如是如實現觀由有名色便有六處如是六處名色爲緣我復思惟由誰有故而有名色如是名色復有何緣我於此事如理思時便生如是如實現觀由有識故便有名色如是名色由識爲緣我齊此識意便退還不越度轉謂識爲緣而有名色名色爲緣而有六處六處爲緣而有其觸觸爲緣受受爲緣愛愛爲緣取取爲緣有有爲緣生生爲緣故便有老死愁歎憂苦擾惱生起如是積集純大苦聚我復思惟無有誰故而無老死由誰滅故老死隨滅我即於此如理思時便生如是如實現觀無有生故便無老死由生滅故老死隨滅我復思惟無有誰故而

良八

七

無有生由誰滅故此生隨滅我即於此如理思時便生如是如實現觀無有有故便無有生由有滅故生即隨滅我復思惟無有誰故而無有有由誰滅故此有隨滅我即於此如理思時便生如是如實現觀無有取故便無有有由取滅故有即隨滅我復思惟無有誰故而無有取由誰滅故此取隨滅我即於此如理思時便生如是如實現觀無有愛故便無有取由愛滅故取即隨滅我復思惟無有誰故而無有愛由誰滅故此愛隨滅我即於此如理思時便生如是如實現觀無有受故便無有愛由受滅故愛即隨滅我復思惟無有誰故而無有受由誰滅故此受隨滅我即於此如理思時便生如是如實現觀無有觸故便無有受由觸滅故受即隨滅我復思惟

無有誰故而無有觸由誰滅故此觸隨滅我
即於此如理思時便生如是如實現觀無六
處故便無有觸六處滅故觸即隨滅我復思
惟無有誰故而無六處由誰滅故六處隨滅
我即於此如理思時便生如是如實現觀無
名色故便無六處名色滅故六處隨滅我復
思惟無有誰故而無名色由誰滅故名色隨
滅我即於此如理思時便生如是如實現觀
無有識故便無名色由識滅故名色隨滅我
復思惟無有誰故而無有識由誰滅故此識
隨滅我即於此如理思時便生如是如實現
觀無有行故便無有識由行滅故識即隨滅
我復思惟無有誰故而無有行由誰滅故此
行隨滅我即於此如理思時便生如是如實
現觀無無明故便無有行無明滅故行即隨

滅由行滅故識亦隨滅由識滅故名色隨滅
名色滅故六處隨滅六處滅故觸亦隨滅由
觸滅故受亦隨滅由受滅故愛亦隨滅由愛
滅故取亦隨滅由取滅故有亦隨滅由有滅
故生亦隨滅由生滅故老死愁歎憂苦擾惱
皆亦隨滅如是永滅純大苦聚我復思惟我
今證得舊道舊徑舊所行跡古昔諸仙之所
遊履譬如有人遊行曠野嶮穢稠林歛然值
遇舊道舊徑舊所行跡古昔諸人嘗所遊履
彼即尋行既尋行已見舊城郭古昔王都園
林池沼無不具足淨妙街衢甚可愛樂其人
見已如是思惟我今宜應速詣王所啓白斯
事爾時彼人便到王所啓白王言大王當知
我有因緣遊行曠野嶮穢稠林歛然值遇舊
道舊徑舊所行跡古昔諸人嘗所遊履我即

尋行既尋行已見舊城郭古昔王都園林池沼無不具足淨妙街衢甚可愛樂大王今者若都被城定使大王昌隆廣大安隱豐樂人民熾盛爾時其王便都被城後時王都昌隆廣大安隱豐樂人民熾盛我亦如是今已證

得舊道舊徑舊所行跡古昔諸仙嘗所遊履何等名爲舊道舊徑舊所行跡古昔諸仙嘗所遊履當知即是八支聖道謂初正見次正思惟正語正業正命正勤正念正定唯至第八如是名爲舊道舊徑舊所行跡古昔諸仙

良八

九

嘗所遊履我昔尋行既尋行已曾見老死見老死集見老死滅見於老死趣滅行跡如是曾見生有取愛受觸六處名色識行曾見行集曾見行滅曾見於行趣滅行跡我於此法自然通達現等覺已告諸苾芻諸苾芻尼鄔

波索迦鄔波斯迦及告種種外道沙門諸婆羅門雜出家類無量大衆是諸苾芻若於此中能修正行成能證者便能證得正理法善諸苾芻尼鄔波索迦鄔波斯迦無量大衆若於此中能正修行成能證者便能證得正理法善如是乃能增廣梵行亦當饒益無量衆生爲諸天人正善開示時諸苾芻及諸菩薩摩訶薩等無量大衆聞佛所說歎未曾有皆大歡喜信受奉行

佛說緣起聖道經